

Edizioni

- letto 624 volte

Aston

?Pus flum Jordan ai vist e-l monimen,
a vos, vers Dieus, qu'es senher dels senhors,
ne ren merces, quar vos plac tan d'onors
que-l sancte loc, on nasques veramen,
m'avetz mostrat, don ai mon cor jauzen;
quar s'ieu era en Proensa, d'un an
no-m clamarian Sarrazis Johan.

Ara-ns don Dieus bona mar e bon ven
e bona nau e bos governadors,
qu'a Marcelha m'en vuelh tornar de cors;
quar s'ieu era de lay mar veramen,
Acre e Sur e Tripol e-l Sirven
e l'Espital e-l Templ' e-l rey Johan
coman a Dieu, e l'aigua de Rotlan.

Qu' Englaterra a croy emendamen
del rey Richart; e Fransa ab sas flors,
solli'aver bon rey e bos senhors,
e Espanha un autre rey valen,
e Montferrat bo marques eyssamen,
e l'Emperi emperador prezan;
aquestz qu'i son no sai quo-s captenran.

Belh senher Dieus, si feyssetz a mon sen,
ben guardaratz qui faitz emperadors
ni qui faitz reys ni datz castels ni tors;
quar pus son rics vos tenon a nien.
Qu'ieu vi antan faire man sagramen
l'emperador, don ar s'en vai camjan
quo fes lo Guasc que traissetz de l'afan.

Emperador, Damiata-us aten,
e nued e jorn plora la blanca tors
per vostr'aigla, qu'en gitet us voutors.
Volpilla es aigla que voutors pren!

Anta y avetz e-l Soudan onramen,
e, part l'anta, avetz y tug tal dan
que nostra ley s'en vai trop rezeguan.

- letto 441 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-58>